

全上古三代秦漢
三國六朝文

漢

第二函
第十冊

全後漢文卷二十四

烏程嚴可均校輯

班固

固字孟堅彪子永平中召詣校書部除蘭臺令史遷爲郎建初中遷玄武司馬永元初大將軍竇憲出塞已爲中護軍行中郎將事及憲敗坐下獄死年六十一有白虎通德論六卷漢書一百十五卷集十七卷

終南山賦

伊彼終南巋巖嶙圉槩青宮觸紫辰嶽峯鬱律萃于霞雰曖曖藹藹若鬼若神傍吐飛瀨上挺修竹玄泉落落密蔭沈沈榮期綺季此焉恬心三春之季孟夏之初天氣肅清周覽八隅皇鸞鸞驚警乃前驅爾其珍怪碧玉挺其阿蜜房溜其巔案文選蜀都賦注引班固終南頌有此語或頌卽翔鳳哀鳴集其上清水泌流注其前彭祖宅已蟬蛻安期賦之誤

饗已延年唯至德之為美我皇應福已來臻埽神壇已告誠薦珍

馨已祈仙嗟茲介福永鍾億萬年

初學記五

流澤遂而成水停積結而為山

文選魏都賦注又天台山賦注

固僊靈之所遊集

文選頭陀寺碑注

覽海賦

運之修短不豫期也

文選潘岳西征賦注二語耳

案此賦今見存者僅

收案張溥本有遊居賦即冀州賦也乃班彪所作誤收

兩都賦序

或曰賦者古詩之流也昔成康沒而頌聲寢王澤竭而詩不作大漢初定日不暇給至于武宣之世乃崇禮官考文章內設金馬石渠之署外興樂府協律之事已興廢繼絕潤色鴻業是已眾庶悅豫福應尤盛白麟赤雁芝房寶鼎之歌薦于郊廟神雀五鳳甘露黃龍之瑞已為年紀故言語侍從之臣若司馬相如虞丘壽王東

方朔枚皋王褒劉向之屬朝夕論思日月獻納而公卿大臣御史大夫兒寬太常孔臧大中大夫董仲舒宗正劉德太子太傅蕭望之等時時間作或曰抒下情而通諷諭或曰宣上德而盡忠孝雍容揄揚著于後嗣抑亦雅頌之亞也故孝成之世論而錄之蓋奏御者千有餘篇而後大漢之文章炳焉與三代同風且夫道有夷隆學有麤密因時而建德者不曰遠近易則故皋陶歌虞奚斯頌魯同見采于孔氏列于詩書其義一也稽之上古則如彼考之漢室又如此斯事雖細然先臣之舊式國家之遺美不可闕也臣竊見海內清平朝廷無事京師修宮室浚城隍起苑囿已備制度西土耆老咸懷怨思冀上之睠顧而盛稱長安舊制有陋雒邑之議故臣作兩都賦已極眾人之所眩曜折已今之法度其詞曰

西都賦

有西都賓問于東都主人曰蓋聞皇漢之初經營也嘗有意乎都

河洛矣輟而弗康實用西遷作我上都主人聞其故而觀其制乎
主人曰未也願賓攄懷舊之蓄念發思古之幽情博我曰皇道弘
我曰漢京賓曰唯唯漢之西都在于雍州實曰長安左據函谷二
嶠之阻表曰太華終南之山右界褒斜隴首之險帶曰洪河涇渭
之川眾流之隈汧涌其西華實之毛則九州之上腴焉防禦之阻
則天地之隩區焉是故橫被六合三成帝畿周曰龍興秦曰虎視
及至大漢受命而都之也仰悟東井之精俯協河圖之靈奉春建
策畱侯演成天人合應曰發皇明乃眷西顧實惟作京于是晞秦
嶺瞰北阜挾灃灞據龍首圖皇基于億載度宏規而大起肇自高
而終平世增飾曰崇麗歷十二之延祚故窮泰而極修建金城而
萬雉呀周池而成淵披三條之廣路立十二之通門內則街衢洞
達閭閻且千九市開場貨別隧分人不得顧車不得旋闐城溢郭
旁流百塵紅塵四合煙雲相連于是旣庶且富娛樂無疆都人士

女殊異乎五方遊士擬于公侯列肆侈于姬姜鄉曲豪舉遊俠之
雄節慕原嘗名亞春陵連交合眾騁驚乎其中若乃觀其四郊浮
遊近縣則南望杜霸北眺五陵名都對郭邑居相承英俊之域紱
冕所興冠蓋如雲七相五公與乎州郡之豪傑五都之貨殖三選
七遷充奉陵邑蓋已強幹弱枝隆上都而觀萬國也封畿之內厥
土千里遑躒諸夏兼其所有其陽則崇山隱天幽林穹谷陸海珍
藏藍田美玉商洛緣其隈鄠杜濱其足源泉灌注陂池交屬竹林
果園芳草甘木郊野之富號爲近蜀其陰則冠已九嶷陪已甘泉
乃有靈宮起乎其中秦漢之所極觀淵雲之所頌歎于是乎存焉
下有鄭白之沃衣食之源提封五萬疆場綺分溝塍刻鏤原隰龍
鱗決渠降雨荷畝成雲五穀垂穎桑麻鋪棗東郊則有通溝大漕
潰渭洞河汎舟山東控引淮湖與海通波西郊則有上囿禁苑林
麓藪澤陂池連乎蜀漢繚已周牆四百餘里離宮別館三十六所

神池靈沼往往而在其中乃有九真之麟大宛之馬黃支之犀條
支之鳥踰崑崙越巨海殊方異類至于三萬里其宮室也體象乎
天地經緯乎陰陽據坤靈之正位倣太紫之圓方樹中天之華闕
豐冠山之朱堂因瓌材而究奇抗應龍之虹梁列焚燎已布翼荷
棟桴而高驤雕玉璫已居楹裁金璧已飾璫發五色之渥彩光燭
朗已景彰于是左城右平重軒三階閨房周通門闥洞開列鐘虡
于中庭立金人于端闈仍增崖而衡闕臨峻路而啟扉徇已離宮
別寢承已崇臺閒館煥若列宿紫宮是環清涼宣溫神仙長年金
華玉堂白虎麒麟區宇若茲不可殫論增槃業峨登降炤爛殊形
詭制每各異觀乘茵步輦惟所息宴後宮則有掖庭椒房后妃之
室合歡增城安處常寧茝若椒風披香發越蘭林蕙草鴛鸞飛翔
之列昭陽特盛隆平孝成屋不呈材牆不露形裒已藻繡絡已綸
連隨侯明月錯落其閒金釭銜璧是爲列錢翡翠火齊流耀含英

懸黎垂棘夜光在焉于是玄墀鉅砌玉階彤庭硤礧綵緻琳珉青
熒珊瑚碧樹周阿而生紅羅威纒綺組繽紛精曜華燭俯仰如神
後宮之號十有四位窈窕繁華更盛迭貴處乎斯列者蓋已百數
左右庭中朝堂百寮之位蕭曹魏邴謀謨乎其上佐命則垂統輔
翼則成化流大漢之愷悌盪亡秦之毒螫故令斯人揚樂和之聲
作畫一之歌功德著乎祖宗膏澤洽乎黎庶又有天祿石渠典籍
之府命夫惇誨故老名儒師傅講論乎六藝稽合乎同異又有承
明金馬著作之庭大雅宏達于茲爲羣元元本本殫見洽聞啟發
篇章校理祕文周已鉤陳之位衛已嚴更之署總禮官之甲科羣
百郡之廉孝虎賁贅衣闔閭寺陞戟百重各有典司周廬千列
徼道綺錯輦路經營修除飛閣自未央而連桂宮北彌明光而亘
長樂凌澄道而超西墉提建章而連外屬設璧門之鳳闕上觚稜
而棲金爵內則別風之嶠嶢眇麗巧而聳擢張千門而立萬戶順

陰陽已開闔爾乃正殿崔嵬層構厥高臨乎未央經駘盪而出馭
娑洞杳詣已與天梁上反宇已蓋戴激日景而納光神明鬱其特
起遂偃蹇而上躋軼雲雨于太半虹霓迴帶于棼楣雖輕迅與僞
狡猶愕眙而不能階攀井幹而未半目眴轉而意迷舍櫺檻而卻
倚若顛墜而復稽魂怳怳已失度巡迴塗而下低既懲懼于登望
降周流已徬徨步甬道已縈紆又杳窅而不見陽排飛闥而上出
若遊目于天表侶無依而洋洋前厠中而後太液覽滄海之湯湯
揚波濤于碣石激神嶽之蔣蔣濫瀛洲與方壺蓬萊起乎中央于
是靈草冬榮神木叢生巖峻嶮崿金石崢嶸抗仙掌已承露擢雙
立之金莖軼埃竭之混濁鮮顯氣之清英騁文成之不誕馳五利
之所刊庶松喬之羣類時遊從乎斯庭實列仙之攸館非吾人之
所靈爾乃盛娛遊之壯觀奮泰武乎上囿因茲已威戎夸狄耀威
靈而講武事命荊州使起烏詔梁野而驅獸毛羣內闐飛羽上覆

接翼側足集禁林而屯聚水衡虞人修其營表種別羣分部曲有
署罟網連絃籠山絡野列卒周而星羅雲布于是乘鑾輿備法駕
帥羣臣披飛廉入苑門遂繞鄴歷上蘭六師發逐百獸駭殫震
震爚爚雷奔電激草木塗地山淵反覆蹂躪其十二三乃勃怒而
少息爾乃期門伏飛列刃鑽鏃要蹑追蹤鳥驚觸絲獸駭值鋒機
不虛掎弦不再控矢不單殺中必疊雙颶颶紛紛矰繳相纏風毛
雨血灑野蔽天平原赤勇士厲援狔失木豺狼懾竄爾乃移師趨
險竝蹈潛穢窮虎奔突狂兇觸蹙許少施巧秦成力折掎僇狡扼
猛噬脫角挫脰徒搏獨殺挾師豹拖熊螭曳犀羸頓象羆超洞壑
越峻崖蹙巘巖鉅石隕松柏仆叢林摧草木無餘禽獸殄夷于是
天子乃登屬玉之館歷長楊之榭覽山川之體勢觀三軍之殺獲
原野蕭條目極四裔禽相鎮壓獸相枕藉然後收禽會眾論功賜
胙陳輕騎已行魚騰酒車已斟酌割鮮野食舉烽命酌饗賜畢勞

逸齊大路鳴鑾容與徘徊集乎豫章之宇臨乎昆明之池左牽牛
而右織女侶雲漢之無涯茂樹蔭蔚芳草被隄蘭茝發色畦畦猗
猗若摘錦布繡燭耀乎其陂鳥則玄鶴白鷺黃鵠鵙鸛鵒鵙鵒
鳬鷺鴻雁朝發河海夕宿江漢沈浮往來雲集霧散于是後宮乘
輶輅登龍舟張鳳蓋建華旗祛黼帷鏡清流靡微風澹淡浮耀女
謳鼓吹震聲激越營厲天鳥羣翔魚窺淵招白鵬下雙鵠揄文竿
出比目撫鴻罾御綰繳方舟竝驚俛仰極樂遂乃風舉雲搖浮遊
溥覽前乘秦嶺後越九嶷東薄河華西涉岐雍宮館所歷百有餘
區行所朝夕儲不改供禮上下而接山川究休祐之所用采遊童
之謹謠第從臣之嘉頌于斯之時都都相望邑邑相屬國藉十世
之基家承百年之業士食舊德之名氏農服先疇之畝畝商修族
世之所嚮工用高曾之規矩粲乎隱隱各得其所若臣者徒觀迹
于舊墟聞之乎故老十分而未得其一端故不能徧舉也

東都賦

東都主人喟然而歎曰痛乎風俗之移人也子實秦人矜夸館室
保界河山信識昭襄而知始皇矣烏睹大漢之云爲乎夫大漢之
開元也奮布衣已登皇位由數朞而創萬代蓋六籍所不能談前
聖靡得言焉當此之時功有橫而當天討有逆而順民故婁敬度
勢而獻其說蕭公權宜而拓其制時豈泰而安之哉計不得已已
也吾子曾不是睹顧曜後嗣之末造不亦暗乎今將語子已建武
之治永平之事監于太清已變子之惑志往者王莽作逆漢祚中
缺天人致誅六合相滅于時之亂生人幾亡鬼神泯絕壑無完樞
郭罔遺室原野厭人之肉川谷流人之血秦項之災猶不克半書
契已來未之或紀故下人號而上訴上帝懷而降監乃致命乎聖
皇于是聖皇乃握乾符闡坤珍披皇圖稽帝文赫然發憤應若興
雲霆擊昆陽憑怒雷震遂超大河跨北嶽立號高邑建都河洛紹

百王之荒屯因造化之盪滌體元立制繼天而作系唐統接漢緒
茂育羣生恢復疆宇勲兼乎在昔事勤乎三五豈特方軌竝迹紛
綸后辟治近古之所務蹈一聖之險易云爾哉且夫建武之元天
地革命四海之內更造夫婦肇有父子君臣初建人倫實始斯乃
伏犧氏之所已基皇德也分州土立市朝作舟輿造器械斯乃軒
轅氏之所已開帝功也龔行天罰應天順人斯乃湯武之所已昭
王業也遷都改邑有殷宗中興之則焉卽土之中有周成隆平之
制焉不階尺土一人之柄同符乎高祖克己復禮已奉終始允恭
乎孝文憲章稽古封岱勒成儀炳乎世宗案六經而校德眇古昔
而論功仁聖之事既該而帝王之道備矣至于永平之際重熙而
累洽盛三雍之上儀修袞龍之法服鋪鴻藻信景鑠揚世廟正雅
樂人神之和允洽羣臣之序既肅乃動大輅遵皇衢省方巡狩窮
覽萬國之有無考聲教之所被散皇明已燭幽然後增周舊修洛

邑扇巍巍顯翼翼光漢京于諸夏總八方而爲之極是已皇城之
內宮室光明闕庭神麗奢不可踰儉不能侈外則因原野已作苑
塡流泉而爲沼發蘋藻已潛魚豐圃草已毓獸制同乎梁鄒誼合
乎靈囿若乃順時節而蒐狩簡車徒已講武則必臨之已王制考
之已風雅歷騶虞覽駟鐵嘉車攻采吉日禮官整儀乘輿乃出于
是發鯨魚鏗華鐘登玉輅乘時龍鳳蓋琴麗龠鑾玲瓏天官景從
寢威盛容山靈護野屬御方神雨師汎灑風伯清塵千乘雷起萬
騎紛紜元戎竟野戈鋌彗雲羽旄掃霓旌旗拂天焱焱炎炎揚光
飛文吐爛生風飲野歎山日月爲之奪明丘陵爲之搖震遂集乎
中囿陳師案屯駢部曲列校隊勒三軍誓將帥然後舉烽伐鼓申
令三驅輜車霆激驍騎電驚由基發射范氏施御弦不睨禽轡不
詭遇飛者未及翔走者未及去指顧倏忽獲車已實樂不極盤殺
不盡物馬踠餘足士怒未溱先驅復路屬車案節于是薦三犧效

五牲禮神祇懷百靈覲明堂臨辟雍揚緝熙宣皇風登靈臺考休
徵俯仰乎乾坤參象乎聖躬目中夏而布德瞰四裔而抗稜西盪
河源東澹海濔北動幽崖南耀朱垠殊方別區界絕而不鄰自孝
武之所不征孝宣之所未臣莫不陸讐水慄奔走而來賓遂綏哀
牢開永昌春王三朝會同漢京是日也天子受四海之圖籍膺萬
國之貢珍內撫諸夏外綏百蠻爾乃盛禮興樂供帳置乎雲龍之
庭陳百寮而贊羣后究皇儀而展帝容于是庭實千品旨酒萬鍾
列金罍班玉觴嘉珍御太牢饗爾乃食舉雍徹太師奏樂陳金石
布絲竹鐘鼓鏗鉤管絃煇煜抗五聲極六律歌九功舞八佾韶武
備泰古畢四夷聞奏德廣所及傑佻兜離罔不具集萬樂備百禮
暨皇歡浹羣臣醉降煙燭調元氣然後撞鐘告罷百寮遂退于是
聖上親萬方之歡娛又沐浴于膏澤懼其侈心之將萌而怠于東
作也乃申舊章下明詔命有司班憲度昭節儉示太素去後宮之

麗飾埴乘輿之服御抑工商之淫業興農桑之盛務遂令海內棄
末而反本背僞而歸真女修織紉男務耕耘器用陶匏服尚素玄
恥織靡而不服賤奇麗而弗珍捐金于山沈珠于淵于是百姓滌
瑕盪穢而鏡至清形神寂漠耳目弗營嗜慾之源滅廉恥之心生
莫不優游而自得玉潤而金聲是已四海之內學校如林庠序盈
門獻酬交錯俎豆莘莘下舞上歌蹈德詠仁登降飫宴之禮旣畢
因相與嗟歎玄德讜言弘說咸含和而吐氣頌曰盛哉乎斯世今
論者但知誦虞夏之書詠殷周之詩講義文之易論孔氏之春秋
罕能精古今之清濁究漢德之所由唯子頗識舊典又徒馳騁乎
末流溫故知新已難而知德者鮮矣且夫僻界西戎險阻四塞修
其防禦孰與處乎土中平夷洞達萬方輻湊秦嶺九嶷涇渭之川
曷若四瀆五嶽帶河泝洛圖書之淵建章甘泉館御列仙孰與靈
臺明堂統和天人太液昆明鳥獸之囿曷若辟雍海流道德之富

游俠踰侈犯義侵禮孰與同履法度翼翼濟濟也子徒習秦阿房之造天而不知京洛之有制也識函谷之可關而不知王者之無外也主人之辭未終西都賓矍然失容逡巡降階慄然意下捧手欲辭主人曰復位今將授子已五篇之詩賓既卒業乃稱曰美哉乎斯詩義正乎揚雄事實乎相如匪唯主人之好學蓋乃遭遇乎斯時也小子狂簡不知所裁既聞正道請終身而誦之其詩曰

明堂詩

於昭明堂明堂孔陽聖皇宗祀穆穆煌煌上帝宴饗五位時序誰其配之世祖光武普天率土各已其職猗歟緝熙允懷多福

辟雍詩

乃流辟雍辟雍湯湯聖王莅止造舟爲梁皤皤國老乃父乃兄抑抑威儀孝友光明於赫太上示我漢行洪化惟神永觀厥成

靈臺詩